

DISSERTATIO INAUGURALIS MEDICA,
SISTENS

THEORIAM

GENERALEM

MOTUS PARTIUM SOLIDARUM

CORPORIS HUMANI,

ET REMEDIORUM EUM TAM

EXCITANTIUM QUAM SEDANTIUM,

QUAM AUSPICE DEO PROPITIO

Et Consensu atque Auctoritate Gratiſſæ Facultatis Medicæ,

IN ALMA REGIA FRIDERICIANA,

P R Æ S I D E

DN. D. MICHAELE ALBERTI

SACR. MAJ. REG. BORUSS. AULICO ET CONSIST. MAGDEB. CON

SILIARIO, MED. ET PHILOS. NATUR. PROFESSORE PUBL. ORDIN. ETC.

DECANO H. T. SPECTATISSIMO,

Domino Patrono, ac Promotore suo omni honoris cultu prosequendo,

PRO LICENTIA,

SUMMISQUE IN MEDICINA HONORIBUS ET PRIVILE

GIIS DOCTORALIBUS LEGITIME IMPETRANDIS,

HORIS LOCOQUE CONSUETIS

ANNO MDCCXXX. D

NOVEMBR.

Publicæ ac placidæ eruditorum ventilationi subjiciet


AUCTOR RESPONDENS

JOHANNES SIGISMUNDUS RESTEL,

SERV. ANHALT.

HALÆ MAGDEBURGICÆ,

TYPIS JOH. CHRIST HENDELII, ACAD. TYPOGR.





PROLEGOMENA.



Dro summi creatoris sapientia cognoscenda, nisi alios haberemus fontes, illius certe, quod in examinanda animantium structura deprehendimus, artificii accurata perlustratio ex parte sufficeret. Nihil in hac mirandum magis est, quam infinita vasculorum copia, eorumque fere incredibilis subtilitas, (a) exactissima tamen, tam inter se, quam cum mente, harmonia atque consensus, ita, ut vel minima fibrillula corporis nostri tantisper læsa, statim in consensum trahat non exiguam generis nervosi partem, ejusdemque, ita ut & mentis actiones afficiat, ut hæcce patiens, pro læsæ partis majori vel minori sensibilitate, in vi-

A 2

tæ

(a) Subtilitatem vasculorum egregie experimentis suis demonstrat *Cl. Leeuwenbæk*, qui, ope microscopiorum se cognovisse, perhibet, vasis sanguinei minimi capillaris crassitiem decuplo, ferrosi 60plo, lymphatici 360plo pili crassitie minores esse.

tæ adeo periculum non raro incurrat. Quales Tragedias nervorum punctura, convulsionibus, deliriis, Paralyfi, Apoplexia, imo ipsa morte terminata, nobis conspiciendas præbet. Talis vero inter partes corporis humani consensus, sicut omnia divina opera, certis ordinibus ac directionibus submissa, his tam exacte respondet, ut hujus effectus paullo curatius rimanti nulla certe supersit dubitandi ratio, quin nulla alia, (quoad essentialia scil.) quam hac ratione principalior intelligens & dein corporea substantia creata deprehendatur. Nulla enim est ratio sine Ideis, nullæ Ideæ sine perceptione, sive subtili, sive reflexiva, nulla perceptio sine partium tam inter se, quam cum mente, aliisque, quæ extra nos sunt, substantiis, consensu, & sine facultate, motus a rebus, quæ extra nos positæ sunt, impressos, eoque imprimuntur, modo, diversimode recipiendi & cum mente communicandi. Ut autem corpus nostrum eiusmodi facultatem acquireret, quascunque, vel minimorum motuum, alterationes distincte percipiendi, nequaquam ex dura & inflexili materia, sed ex subtiliori, motibusque suscipiendis magis idonea substantia componendum erat. Quæ cum facile per varios illos motus destrui potuisset, divinisque finibus contrarium esset, artificiosam talem machinam ad pauca tantummodo momenta duraturam construere, sapientissimo consilio, eandem ita fabricare decrevit, ut motus, qui sibi relictus necessariam corporis ejusmodi destructionem produxisset, nunc ejusdem ad plures annos conservationi inserviret.

Medi-

Medicus itaque, circa hoc nobile objectum, finibus divinis, (id quod hominem impr. Christianum decet) conformiter acturus, observat diligentissime machinæ hujus structuram, motus eorumque effectus naturales & præternaturales, inquit & in motuum causas, varias eorum conditiones, directiones, gradus, tam secundum, quam præter naturam, hæcce vario modo comparat tam inter se, quam cum totius corporis structura & partibus, in genere æque ac pro diversa individuorum conditione diversimode consideratis: Quos motus secundum hanc considerationem, in conservationem corporis vergere prævidet, nequaquam supprimit, sed omni studio conservare annititur, quos vero in humani corporis perniciem cessuros cognoscit, hos, perspectis prius horum errorum causis, per remedia, vario usu comprobata, & rationaliter applicata corrigere, conservandæque corporis humani structuræ idoneos reddere, allaborat. Quod negotii genus, cum, ut prospere succedat, non empirice, sed rationaliter suscipi debeat, respectu nempe habito, tam diversitatis læsionum, quæ a diversa natura, constitutione & structura, tum partium motui inservientium, tum causarum motus lædentium, dependet, quam variæ remedium operandi rationis, cujus fundamentum in diversitate partium constituentium, indeque deducendarum virium, quærendum est: Speciminis loco quædam in lucem prolaturus, eo pro virili allaborabo, ut, explicata prius natura, partium moventium atque movendarum, corporumque illas af-

ficientium, inde oriundis varii generis læsionibus accommodata remedia opponam, eorumque operandi rationem, ex causis suis, quantum fieri potest, deducam. Cum autem pagellarum angustia me impediat, quo minus ad specialiora descendere possim, tantum circa generaliora versabor, nec in quævis remedia, causas læsorum motuum remotas, destru-entia, quorsum, ut mihi videtur, omnes, tam eva-cuantium, quam alterantium, classes pertinerent, inquiram, sed in illa tantum, quæ causis proximis sive continentibus, e medio tollendis, accommoda-ta sunt. Annuat sapientissimum Numen meis quali-buscunque laboribus: Tu vero, B.L., errores, si quos commiserim, corriges, & utut vires defint, tamen conatum laudabis.

§. I.

DE remediis, *motibus*, tam *excitandis*, quam *se-dandis*, destinatis, antequam disseram, non in-congruum erit, quædam ex Physiologicis principiis repetere, quibus tota nostra disser-tatio innititur. Hæc vero sunt natura vitæ, sanitatis it. solidorum, atque fluidorum corpus nostrum constituentium.

§. II.

Vita obtinetur motu circulatorio sanguinis, (b) hoc enim extincto mortuus dicitur homo. *Sanus* is dicitur, qui actiones homini proprias exercere valet, cum facili-tate

(b) vid. *Celeb. Hoffmanni Med. Rat. System. Tom. I. P. I. Cap. VIII.*
§. XII.

tate, oblectamento & quadam constantia. (c) Hæ functiones, cum absolvantur, per motus partium quarumcunque, huic l. illi actioni destinatarum, idea vero motus necessario requirat tam movens, quam movendum: Patet hinc motus hos tum bene absolvi, cum movens vim habet, mobile debito modo movendi. Quoniam autem nullum est mobile, quod non habeat vim quandam moventi resistentem, ob quam resistentiam movens certam vim debet consumere in movendo mobili: Quisque facile concedet, ad motum semper requiri relationem quandam inter impetum moventis & resistentiam mobilis. Ubi hæc relatio proportionata est motui debito absolvendo, ibi motus determinatus sequitur. Functiones igitur partium, quæ constant solido movente & fluido mobili, & vice versa, recte administrantur, si justa & determinata ad motum proportio adest. *Sanitas* igitur consistit in proportionem illa solidorum atque fluidorum, qua mediante omnes functiones homini propriæ naturali modo administrantur. Cum autem motus circulatorius sanguinis ex parte sit causa omnium reliquarum functionum: sequitur ut, hæc æquabili naturæque proportionato existente, omnes reliquæ functiones secundum naturam absolvantur, hoc læso, lædantur. *Sanitatis* igitur natura ex mente Cl. HOFFMANNI, l. c. recte exhauritur, si asseramus, quod sit motus sanguinis reliquorumque humorum circulatorius, liber, moderatus & æquabilis, cujus eveniens sive productum illa *Sanitas* formali sua ratione est.

§. III.

(c) vid. Cl. Boerhave Instit. Med. §. I.

§. III.

His præfatis, ut ad scopum nostrum propius accedamus, ex Anatomicis repetendæ sunt Celeb. Anatomicorum, RUYSCHII impr., observationes, quibus detegerunt, totum nostrum corpus esse compagem vasculosam, & totum componi ex canalibus diversæ magnitudinis & Diametri fluidum diversæ naturæ continentibus. Cum igitur omnes partes moveantur proportionate (§. 2.) experientia quoque teste clarum sit, causam proximam motus partium non esse extra nos, sed in ipso nostro corpore hinc necessario sequitur, illam esse vel in solidis vel in fluidis, vel in utrisque simul (d). Quod ut accuratius cognoscamus, naturam & essentiam tam solidorum quam fluidorum accuratius paullo ut perscrutemur necesse est.

§. IV.


Quod ad solida attinet, horum duæ, uti cuique notum est, species, in corpore nostro reperiuntur, duræ nimirum atque mollia. Ad illa pertinent ossa & cartilagine, ad hæc reliquæ corporis partes. De quavis specie seorsim agendum nobis esset: Verum enim vero, cum partes duræ magis sustinendis tuendisque reliquis corporis partibus inserviant, nec, nisi in quibusdam voluntariis motibus, in quibus passive se gerunt, quicquam ad motum conferant, hinc ullo jure pro motuum causis instrumentalibus primariis venditari nequeant, non est, cur

(d) Non quidem negaverim, animam esse primam causam motuum omnium in corpore humano, cum autem ut experientia docet, non immediate, sed mediantibus organis in partes agat, hinc patet, animam non esse causam motuum proximam, quamvis primam.

his explicandis diutius moremur, præsertim, cum Anatomicae demonstrationes doceant, partes has duras in embryonibus & recens natis satis molles deprehendi, hinc eandem fere, ac molles, originem habere.

§. V.

Molles corporis nostri partes fluida variæ indolis continentes, sunt vel manifeste musculosæ, ut cor & reliquæ, quæ musculorum nomine veniunt, l. membranaceæ, ut viscera & vasa omnia. Quæ partes omnes tam musculosæ, quam membranaceæ, quamvis primo intuitu satis simplices videantur, accurata tamen perlustratione ex infinita prope multitudine minimarum partium inter se cohærentium confectæ deprehenduntur. Inspicias enim musculum, quam innumeros, peto, minutissimos canales in se continet! Qui minimi canales, prout microscopiorum ope oculati Anatomici aliique rerum Physicarum observatores indagarunt, cavitate donati, membrana constant, cujus partes constituentes nil sunt, nisi innumera copia canaliculorum adhuc multo minorum, quorum partes constituentes optime armatos quoque fugiunt oculos. Membranosam partem si intueamur, nemo rerum anatomicarum vel aliquantisper gnarus diffitebitur, hanc mox tribus, mox quatuor, mox quinque tunicis conflari, quæ nihil aliud sunt, quam congeries variorum minutissimorum canalium in formam cylindricam vel conicam, vel aliam quamcunque redacta. Quemadmodum vero in tota rerum natura nullus datur, neque compositionis neque divisionis progressus in infinitum, ita & in dividendis corporis nostri partibus ad solidam partem quandam minimam, Physice quidem adhuc compositam,



fitam, sed, ut ita dicam, anatomice simplicissimam perveniendum nobis est, ex qua, cum sibi similibus unita, omnes solidæ corporis humani partes componuntur, quæ dicitur *Fibra minima*.

§. VI.

Fibram hancce minimam, quamvis Anatomice sit simplicissima, Physice tamen pluribus partibus essentialibus inter se unitis compositam esse, ad oculum demonstrat Chymica illius æque ac mechanica resolutio. Partem enim quamvis, omni fluido in poris hærente eluendo separato, in aëre optime siccata, si retortæ committas, per destillationem factam, magnam satis æquæ copiam cum oleo prodire conspicias, capite mortuo friabiliori existente, quod si vehementiori igne urgeas, acquies tandem oleum tenax viscidum vasis undiquaque adhærens, quod, si iterum destillationi subicias, oleum subtile, terra in fundo remanente, præbebit. Caput vero mortuum a priori destillatione in retorta relictum molle ac friabile, si igne aperto comburas, in subtiles cineres conversum videbis. Cum itaque quævis fibra corporis humani, separatis per ignem, aqua, oleo, & subtiliori terra, hi pulverem tenacem concidat, & hinc omnem suam cohæSIONem, quæ ante destillationem satis magna erat, omnino perdat: Patet hinc, modo commemoratas partes fibræ essentielles proportionata unitas vinculum constituere, quo mediante, particulæ terrestres sibi invicem agglutinantur, ita, ut inde firma partium inter se cohæSIO, hinc determinata soliditas, elasticitatis fibrarum fundamentum, proveniat. Hujus rei veritatem magis adhuc comprobatur, C.C. aliorumque ossium Philosophica sic dicta præparatio,

paratio, item, ossium durissimorum in machina Papiniana comminutio, qua, per diuturnam coctionem separatis partibus gelatinosis, ex unione aquæ, olei & terræ subtilissimæ, compositis, ossa in pulverem concidunt. Vim autem hujus gelatinæ, quam in cohæsione partium terrestrium præstat, magis demonstrat glutinis illius effectus, quo scriniarii asseribus firmissime agglutinandis utuntur, ita ut nulla, amplius de modo prolatis dubitandi causa superesse videatur.

§. VII.

Cum itaque fibræ soliditas dependeat a partium constituentium cohæsione, cohæsiō autem firmetur unionē partium terrestrium, mediante vinculo glutinoso sibi adhærentium; cum porro vinculum hocce glutinosum æque ac terra per illud cohærens, hæc, particularum terrestrium sibi invicem adhærentium majori vel minori copia, illud, proportionē partium constituentium variare possit: Habes hinc variarum fibræ simplicis affectionum, nimir. soliditatis, rigiditatis, roboris, crassitie, laxitatis, debilitatis, tenuitatis &c. aliarumque ejus proprietatum fundamentum, quorum aliqualem explicationem hic subnectere non dubito, ut sequentia ex his deducenda dilucidius pateant.

§. VIII.

Soliditatis natura (§. 7.) indigitata est. *Crassities* dependet a majori copia & mole particularum terrestrium inter se cohærentium. Oppositum ejus est *Tenuitas* fibræ. Hæc oritur ab inopia partium, vel terrestrium, vel gletinosarum. Utraque oritur, tum a paucitate particularum talium in M. S. tum a depravata earum indole, cum vel nimis

crassa vel nimis subtilia sunt, & ita fibris constituendis non idonea. Hinc, si per motum sanguinis vehementiorem deterritur de solidis plus, quam restituitur, ut in febribus acutis, in morbis ab inedia, in hecticis corporum consumptionibus, tabe nempe, Phthisi, aliisque videmus, non oritur fibræ tenuitas. *Rigiditas* s. fortitudo fibræ est species quædam crassitie, & dum oritur, quando glutinis natura agglutinandis particulis idonea & in satis magna copia adest, & plures in M. S. reperiuntur particulæ terrestres, firma cohæsione inter se cohærentes, hinc fibra mole & fortitudine tanta fit, ut impingenti corpori, a quo tamen naturaliter moveri debebat, non cedat, sed fere immota maneat. A causis contrario modo existentibus, *Laxitas* oritur, quæ nihil aliud est, quam imminuta cohæsiō & resistentia, qua tali corporum vi cedit, cui plane non, aut non tantum cedere debuisset. Sic rigiditas oritur, vel a nimia particularium terrestrium aut glutinis copia, vel a coalitione vasorum minimorum per gluten nimis spissum, aut nimiam pressionem fluidi latera comprimantis, quæ quidem causa est rigiditatis fibrarum in senibus. Laxitas oritur, vel ab intra, per proportionem partium gluten constituentium depravatam, vel ab extra, per nimiam extensionem fibræ cohæsioni illius non proportionatam. Sic comperimus a fluido nimio impetu ad latera vasorum allabente, vel relaxari, vel plane rumpi fibras. *Roboris, debilitatisque* idea tum clarior evadet, cum vasculorum minimorum explicationem susceperimus. Hinc etiam effectus a diversa fibræ constitutione resultantes eorumque disquisitionem eo differemus, pauca tantum de fibrarum elasticitate moniturus.

§. IX.

Elasticitas in genere considerata est talis corporum conditio, quæ a corpore quovis externo impingente pressa aut extensa, cessante vi premente aut tendente, in statum pristinum resiliunt. Hinc elasticitas fibrarum, quid sit, facile cognoscitur. *Causa* hujus elasticitatis est determinata cohæsiō partium, fibrarum componentium, hinc pro minus aut magis arcta cohæsiōne variat quoque elasticitas, sublato igitur huius cohæsiōnis statu, tollitur elasticitas, hinc fibra elastica, ita tensa, ut quædam partes antea cohærentes, nunc cohærere desinant, elasticitas fibræ imminuitur. Major enim est cohæsiōnis nifus, si multæ partes, quam si paucæ, in illam nitantur. Naturalis igitur fibrarum cohæsiō tanta esse debet, ut a corporibus naturaliter in illam impetum facientibus tendi quidem possint, ita tamen, ut, in statu tensionis, earum cohæsiōnis nifus non minuatur, sed augeatur. Hinc non quævis elasticitas fibrarum naturalis est, sed illa tantum, quæ proportionata est, vi corporum naturaliter in illam impetum facientium. Hinc fibra nimis rigida fluido impetum facienti ita resistens, ut per eius vim nullatenus flecti queat, non gaudet naturali elasticitate. Hinc fibra nimis laxa, quæ se tendi quidem patitur, sed per tensionem hanc talem non acquirit cohæsiōnis nifum, qualis requiritur ad impetum fluidi post tensionem debitam superandum, illudque certum vi protrudendum, non obtinet naturalem elasticitatis gradum. Plura de elasticitate dicenda differam, donec, quædam de fluidorum irrudentium impetu & de canalium relatione ad fluida, ut explicem, ordo me moneat. Elasticitate vero gaudere corporis nostri fibras, tam supra

de cohæsione partium fibrarum allata, quam experientia arguant, si scil. consideremus vim solidorum in protrudendis fluidis, nisum fibrarum discissarum in contractionem, contractionem fibræ mortuæ extensioni resistentem, & alia phænomena, quorum recensitioni ob brevitatis studium in præsentī supersedere cogor. Tantum de fibra simplici.

§. X.

Nunc ordo postulare, ut ad explicandas proprietates canalium & fibris simplicissimis compositorum me accingerem: cum autem hæc, nisi, in fluidorum quæ vehunt, naturam, prius inquiratur, intelligi nequeant, de fluidis quædam præmonere, mihi liceat.

§. XI.

Fluidum corpus est congeries particularum minutissimarum inter se quidem cohærentium, tam parvo tamen cohæsionis nisu, ut ille nisus a paucarum partium constituentium in unam compagem collectarum gravitate superari queat. Hinc *fluidorum elasticitas*, de qua in sequentibus quædam proferentur, non habet fundamentum suum in cohæsione partium illud componentium inter se, uti de solidis elasticis asseruimus, sed in ipsa particularum, ex quibus constant, natura, qua in se ipsas se comprimī patiuntur, & cessante impetu, in pristinum statum resiliunt. Fluida corporis nostri ad motum partium quicquam conferentia, sunt, sanguis & fluidum nerveum. Hæc, cum in mixtione sua multas contineant particulas vere elasticas, quamdiu canalibus continentur, magnam inde sortita sunt potentiam tam solidorum motus varie dirigendi,

di, promovendi & alterandi, quam iisdem efficaciter resistendi, eosque in totum sufflaminandi.

§. XII.

Sanguis est purpureum illud fluidum, quod in vivis animantibus per varias tum artificiales, tum naturales Hæmorrhagias excerni conspiciamus, quodque in cadaveribus satis magna copia in vasis invenimus. Constat hoc fluidum variis inter se diversis partibus, quarum nonnullæ ad nutritionem, quædam ad tenuitatem debitam ipsi conciliandam, quædam ad motus partium legitime promovendos inserviunt. Sunt autem partes illius componentes, aqua, particulæ Sulphureo-Salinæ, quæ salia sunt ut plurimum alcalicæ attamen etiam acidæ, & aliqua mediæ naturæ, gelatina, ex aqua, oleo & subtilissimis terrestribus particulis constans, terra denique cassior; quibus omnibus immixtum est fluidum aereo-æthereum, quæ primaria ejus elasticitatis causa est. Harum partium proportio variat pro diversa sanguinis constitutione, & hæc a varia partium constituentium proportionem, naturam & mixturam dependet. Particularum modo recensitarum existentiam per varia tam Physica quam Chymica experimenta probare possem, nisi jam omnibus nota, & in celeberrimum Medicorum scriptis sufficienter demonstrata esset. Non tamen possum non, cum circulationis integritas ejusque varia turbatio a sanguinis natura, ex eo, quod cum partibus solidis & canalibus corporis nostri in motibus humanæ machinæ tam conservativis quam destructivis alit, commercio, dependeat, ejusque constitutionis læsio, tum a partium componentium vitio, tam a depravata inmixtione, oriunda, innumeras motus alterationis in pejus producat,

ducat, quin quædam de variis illius temperiei læsionibus commententer.

§. XIII.

Sanguinis nempe constitutionem triplici modo lædi posse, ex Physiologicis constat, 1) quidem, si particulæ sanguinem constituentes plane non sunt ejus indolis, quæ sanguinis naturæ respondet: 2) si particulæ quidem, ex quibus naturaliter sanguis componitur, non tamen in debita proportionem, adfunt. 3) Si particulæ sanguinis non debitam mixtionem subeunt. Hæ læsiones, quamvis re ipsa inter se diversæ sint, ita tamen invicem sibi respondent, ut una læsio semper sit alterius causa. De singulis seorsim.

§. XIV.

Prima naturæ sanguinis læsio tam ab *externis*, quam ab *internis* causis cooriri potest. Ad *priorem* classem pertinent varia *venena* tam corrosiva, quam stupefactiva; Priora cum corrosivam nacta sint indolem, erodunt partes, per quas feruntur, ibidemque periculosas excitant inflammationes, gangrænas, sphacelos, enormiter irritando partes sensibiles, spasmos, convulsiones, apoplexiam, Paralytes & alia huius generis mala excitant: Posterioris generis venena stuporem inducunt partibus & toti generi nervoso, motus naturales sufflaminant, & stagnationes atque putredines fluidis, solidis vero obstructions, ad motus necessarios ineptitudines, citasque corruptiones inducunt. Huc quoque pertinet aeris externi depravata natura, si acribus, putredinosi aliisque malignis particulis scatet, quæ vel per inspirationem, vel per poros cutis, M. S. communicantur, & innumeras læsiones, illis a venenis

venis oriundis tantum non semper analogas producunt. *Per causas internas*, quæ in M. S. inferuntur, particulæ heterogeneæ tam innumeræ sunt, ut illis recensendis omnibus ne tractatus quidem sufficeret, hinc quasdam tantum in lucem proferam. *Per motum nimium solidorum* ita *alcalescit* sanguis, ut particulæ gelatinosæ, terrestres, satis blandæ in alcalinas (e) convertantur, quæ præter quam quod nutritioni ineptæ sunt, acridinem concipiunt, hinc fibras nimio motu detritas, neque per materiam quandam nutritiam refectas, debiles reddunt & ob irritationem continuam generis nervosi, motus magis augent, sanguinem plenarie resolvunt, putredini ansam præbent & post varias excitationes partium convulsiones corpus neci tradunt. Acida copiose ingesta, ita, ut a ventriculo aut motu humorum subigi & in Sal medium converti nequeant, mixtionem lædunt, coagulant partem gelatinosam terrestrem sanguinis, eandem immobilem reddunt & impediunt, quo minus cum aqueis sanguinis partibus misceri queat, hinc visciditates, stagnationes, obstructions & id genus alia oriuntur mala. Reliquas hujus indolis M. S. a causis internis læsiones consulto ob brevitatem omitto.

§. XV.

Secundam læsionis M. S. speciem quod attinet, hæc tot modis fieri potest, quot modis proportio inter particulas constituentes immutari potest. Quorum tantum præcipuos in medium afferre placet. Aqueæ particulæ si excedant, sanguis fit nimis tenuis & nutritioni ineptus,

C

partes

(e) vid. Celeb. Dn. *Stahlium* in Fundam. Chym. Dogmat. it. Cl. *Bærbave* Aphor. Pract. §. 76. seqq. it. Celeb. *Hoffmannum* Med. Rat, Syst. T. I. Sect. I. P. I. Cap. V. §. XIV.

partes solidæ debilitantur, cohæſionisque vim amittunt & relaxantur, sanguinis elasticitas imminuitur; aqua enim tantum minimam aut plane nullam ad ſenſum certe elasticitatem habet. Et cum calor & motus sanguinis velocior maximam partem dependeat a particulis Sulphureis reſolutis, hæ autem, ſi aquæ proportio nimia eſt, eadem involvantur, ut ſui juris fieri nequeant; hinc calor sanguinis imminuitur, motus ejusdem retardatur, hinc chylus non recte coquitur, excretiones atque ſecretiones turbantur, inde cacochymia, & reliqua ex ea oriunda mala proveniunt. *Sulphureæ* ſi dominantur, non poſſunt a reliquis sanguinis partibus debito modo temperari, hinc plures juſto earum ſui juris factæ, per motum sanguinis reſolvuntur, aerem reliquis interſperſum expandunt, hinc oritur vaſorum nimia diſtenſio, quæ ſimul irritantur, hinc calor nimius sanguinis, hinc febres acutæ. In gelatinofam & terreſtrem partem agunt præterea hæ reſolutæ Sulphureæ particulæ, eam alcalicam reddendo, hinc morbi omnes ab alcali nimio (§. 14.): *terreæ & gelatinofæ* particulæ, ſi proportionem aucta adſint, non ſatis diluuntur, hinc coagulantur, viſcidus inde redditur ſanguis, vaſis adhærens motuique ineptus; oriuntur igitur ſtagnationes, obſtructiones viſcerum, & mala, quæ a mixtione læſa produci, in ſequentibus explicabimus.

§. XVI.

Ex mixtione læſa multi oriuntur morbi, quos ex proportionem læſa produci (§. 15.) aſſeruimus, particulæ enim cum reliquis non exacte mixtæ ſui juris fiunt, hinc eosdem morbos pariunt, qui ſuccedunt, ſi nimia, quoad proportionem, copia adſint. Maximum damnum œconomiae

miæ animali afferunt particulæ gelatinosæ & terrestres, per acidum in M. S. præcipitatæ, & a mixtione liberæ, quæ non satis dilutæ inviscantur, vasa obstipant capillaria, hinc stagnationes, obstructions, infarctus, scirrhi &c. lymphaticæ tenues majori copia per vasa lymphatica transeuntes, ea nimium distendunt, rumpunt, hinc extravasantur variasque Hydropis & Oedematum species producunt.

§. XVII.

Et hæ sunt illæ proprietates & læsiones fluidi sanguinei absolutæ, quas subire potest, absque habito respectu ad canales; in quibus movetur. Reliqua requisita & vitia hujus fluidi respectiva, i. e., quæ dependent a relatione, quam habere debent ad vasa, in quibus vehuntur, tum recensabo, cum prius naturam & læsiones canalium fluida continentium indagaverim. Horum examen tum institutam, cum de fluido nerveo quædam præmiserò.

§. XVIII.

Fluidum nerveum est illud omnium fluidorum tenuissimum & maxime elasticum, quod in cerebro separatur, omnesque nerveas & membranosas partes irrigat, & præcipuum motuum in solidis vigentium instrumentum est. De hocce fluido, cum sit tenuissimum, hinc sensibus nequaquam exponatur, a priori nihil certi determinari potest, illius tamen existentiam multi celeberrimorum Medicorum, imprimis Cel. HOFFMANNUS (f) Cl. BOERHAVE (g) aliique variis argumentis demonstrarunt, ut acta agerem, si argumenta ex horum scriptis depromere, & dissertationi meæ inferere vellem. Materiam fluidi ner-

(f) Med. Rat. Syst. T. I. Sect. I. P. III. Cap. I.

(g) Instit. Med. § 274. 275. 284. seqq.

vei esse delibatissimam chyli portionem, quæ non solum ad motum partium, sed etiam ad nutritionem nerveo-membranosarum partium conducat, satis docte probat sæpe laudatus BOERHAVE (*b*) & SANTORINUS (*i*). Hinc videmus alimenta optimum chylum præbentia, chylique bonam in sanguine coctionem, augere fluidi nervei copiam, malas ciborum digestiones eam imminuere partem, nervo abscisso, contabescere, & non amplius nutriri &c. Sufficiant hæc de fluido nerveo absolute, sine respectu ad canales, in quibus vehitur, considerato.

§. XIX.

Ex fibris multis secundum longitudinem & latitudinem inter se cohærentibus fit membrana tenuissima: ex hac in cylindricam figuram flexa fit canalis minimus cavitate donatus & fluido vehendo aptus. Minimi itaque canales, cum ex fibris inter se cohærentibus compositi sint, de omnibus simul fibrarum simplicium proprietatibus, virtutibus atque vitiis participant. Hinc ex arcta fibrarum cohæsione canales fiunt *solidi*, qui majus adhuc robor acquirunt, si ex fibris fortibus multiplici & varia serie sibi incumbentibus & arcte cohærentibus constant; sin fibris debilibus, paucis, laxè inter se cohærentibus, componuntur, *debiles* quoque & *laxi* inde oriuntur canaliculi. Cum autem ex diversitate roboris & debilitatis, rigiditatis & laxitatis diversus quoque oriatur resistentiæ gradus contrariantis corpori impingenti, corpus autem, in latera canalium vim suam exerens, sit fluidum, hinc patet, dari relationem quandam, inter vim canalium & vim fluidorum ad latera eorum

(*b*) Ibid. § 438 seqq.

(*i*) Tr. de Nutritione Animali §. XXVII. seq. & XLVII. seqq.

eorum allidentium (§. 2.): ex hoc porro sequitur, dari certas generaliores canalium proprietates relativas, quæ, ad fluidorum motum vel promovendum, vel destruendum, aliquid conferunt, ad quas pro instituti ratione explicandas in præsentime accingo.

§. XX.

Omnia corporis solida, & per consequens, canaliculi quoque minimi gaudent certo resistantiæ gradu (§. 7. 8. 9. 19.). Fluidum impetu determinato in canalium latera impingens, semper aliquid de motu suo perdit, quoties in resistantiam quandam incurrit; occurrit autem tot resistantiis, quot puncta sunt in lateribus canalium ad quæ allabuntur. Fluidum enim non semper per axin canalium trajicitur, sed plerumque angulum acutum, cum canalibus lateribus format, præsertim si canales conicæ magis, quam cylindricæ sint figuræ. Ponamus itaque, talem *canalem conicum minimum esse inflexilem, vel in relatione ad impetum, quo fluidum fertur, nimis rigidum*, ut ante tensionem, cum fluido allabente, in æquilibrio sit, patet, impetum a re quadam movente fluido impressum semper eo magis imminui, quo longius canalus distat a centro motus: corpuscula enim fluidi, laterum, (quæ hic non elastica supponuntur, sed nimis rigida, & impetui fluidi nequaquam cedentia,) punctis occurrentia, eodem quidem, quo inciderunt, angulo, sed non eodem impetu reflectuntur ad contrarium latus, ubi de novo, eandem resistantiam inveniunt, per quam iterum aliquid de impetu suo perdunt, quod idem fit, si ab hoc latere, post reflexionem secundam, ad puncta lateris oppositi iterum allidunt: quo longius igitur a centro motus feruntur, eadem ma-

nente vi primi moventis, eo magis de impetu & celeritate amittunt; hinc in ejusmodi canalibus fluidi motus cito retardatur, aut plane subsistit, quod adhuc magis fit in vasculis minimis, ubi non solum plura fluidorum puncta in contactum laterum veniunt, sed & multo sæpius, quam in vasis majoribus, ob laterum sibi oppositorum propinquitatem. Motu fluidorum antecedentium hoc modo retardato, subsequenter & cordi propinquioribus fluidis, non conceditur facultas, ea velocitate progrediendi, quæ a corde propelluntur, hinc cordi impellenti resistunt, ejus contractionem sensim, magis magisque impediunt; hinc ejus Systole minuitur, Diastole augetur. Impedito sic fluidorum motu, debilitata moventis vi, fluida sic plane subsisterent. Hinc novo impetu opus est, ut fluida protrudantur. In vasculis, naturali tono gaudentibus, vis talis reperitur, qualis necessaria est ad fluidorum motum eodem tenore promovendum: In vasculis nimis rigidis, qualia antea supposuimus, non æque. Namque canales nimis rigidi, fluidi allidentis impetui non cedunt, cui tamen naturaliter cedere deberent, (§. 8. 9. 19.). Si duæ vires ita in se invicem agunt, ut unum tantum reagat, quantum alterum agit, dicuntur esse in æquilibrio. Fibræ & canales nimis rigidi, cum fluidi impetui non cedant, antequam tendantur, tantum reagent in fluida, quantum vis fluidi moti in ipsos agit, hinc cum fluido in æquilibrio sunt: In statu autem æquilibrii nullus fit motus. In hoc igitur statu rigiditatis nulla sequetur tensio canalium, nulla fluidorum protrusio. Hæc est ratio, cur motus ob fibras rigidas retardetur. Inde quoque intelligitur causa motus languidi in senibus, hinc veritas proverbii, quod senectus
ipsa

ipsa morbus sit. Eadem motus sanguinis progressivi retardatio oritur, si vehatur in *canalibus*, quorum latera *nimis laxè cohærent*, & fluido impetum facienti plane non, aut non sufficienter resistunt. Cum enim impetus fluidi ad latera directus sit, uti ex superioribus constat, in his autem nulla plane, aut minimum, fluidi vi non proportionata, sit resistentia, fluidum non desistit latera illa dilatare tamdiu, quamdiu vel minimo adhuc impetu gaudet, itaque fluidum impulsum, in lateribus omnino laxatis dilatandis, omnem suam vim consumit, ita, ut nullus ipsi resistet impetus ulterius progrediendi, nisi, qui a gravitate aut impulsu subsequenti fluidi dependet, cum igitur omnem fere primi moventis vim amiserit, hinc patet, motum ejus maximopere fore retardatum, imò tandem plane subsistere. Hinc ad motum fluidorum in corpore humano, per canales præsertim minimos prosequendum, necessum fuit, ut solida, per quæ feruntur, nec sint p. n. rigida, nec p. n. laxa, sed determinato & motibus naturalibus proportionato robore gaudeant ac elasticitate. Hunc elasticitatis gradum stricte & secundum numeros determinare per arduum foret, eo tamen annitar, ut de relatione inter solida atque fluida in statu naturali constituta quædam eruam, quæ Medico in cognitione morborum, & medicamentorum applicatione absolute necessaria sunt.

§. XXI.

Motus humorum, si per tenerrima vascula propagari debet, in minimis quoque vasculis, arteriosis præsertim, Systolen quandam & Diastolen requirit, quæ quidem in minutissimis canalibus sensibus obvia non est, sed tamen sub analogia tremoris, aut vix sensibilis oscillationis per i-
magi-

maginationem concipi potest. Ut enim vascula minima
 iusta elasticitate gaudeant, quæ ad motum fluidorum per
 ea promovendum requiritur, latera vasculorum in statu
 naturali, & ante impulsu fluidi, debent gaudere tanto
 resistantiæ gradu, qui fluidi appulsi vi non æqualis est, sed
 tum demum æqualis fit, si post aliqualem tensionem late-
 rum per impetum fluidi factam, gradus elasticitatis & ni-
 sus in contractionem aliquatenus auctus est. In tantum
 autem per tensionem elasticitatis & resistantiæ gradus de-
 bet augeri, ut consumto impetu fluidi, in distendendis la-
 teribus vasculorum, laterum resistantia par sit, fluido tan-
 ta vi protrudendo, quanta vi fluidum impellebatur in la-
 tera canalis, ante illorum tensionem. Hinc sequitur, ut
 partes fibrosæ minima vascula componentes tanto nisu in
 cohæsiōem cohærere debeant, ut per naturalem & sani-
 tati convenientem impulsu fluidorum non ultra sphæ-
 ram, i. e. non ita tendantur, ut, a cohæsiōe remotis qui-
 busdam fibrillulis, nifus in contractionem minuatur. Hoc
 enim minuto minuitur elasticitas, & vis, fluidum ulterius
 protrudendi. Hinc retardatur motus. Hæc conditio
 minimorum vasculorum, & hæc relatio solidorum ad flui-
 da, meo quidem iudicio in medicis alias dicitur, *Tonus na-*
turalis solidorum, & duplicem habet causam, nempe:
 1) naturalem & intrinsecam a cohæsiōe dependentem fi-
 brarum resistantiam, de qua modo locuti sumus. 2) Huic
 nifui supervenientem vim nervorum, de qua, in sequenti-
 bus quædam proferemus. Ex supra allatis patet, *quanta*
in corpore humano debeat esse sanguinis copia, ut motus re-
 cte procedant, nempe tanta, ad quam, per vasa omnia di-
 stributam, protrudendam debito modo, non requiritur
 major

major vasorum impetus, quam qui per tensionem cohæsioni eorum & robori proportionatam obtineri potest. Quod si vero tanta adest in corpore humano sanguinis copia, ut per eam vasa ultra sphaeram cohæsionis premantur &, ad quam justo modo protrudendam, tantus requiritur impetus vasorum, ad quem producendum tensio vasorum ita fortis fieri deberet, ut vasa hinc elasticitatem suam perderent, tum meo quidem iudicio dicitur adesse, *Plethora ad vires*. Hinc, si copia sanguinis in corpore adeo imminuta est, ut non apta sit, vasa omnia in tantum tendere æqualiter, ut producat talis contractionis nifus, qualis requiritur ad protrudendum naturaliter sanguinem, corpus *sanguinis defectu* laborare dicitur.

§. XXII.

Recensitis generalioribus canalium proprietatibus & relationibus erga fluida movenda, ad specialiora nunc descendendo. Vasa minima corporis nostri sunt duplicis generis, musculosa nimirum, ex quibus omnes muscoli, & nervosa, ex quibus membranæ oriuntur. Ex hoc duplici systemate omnes corporis nostri partes conflatas esse, egregie demonstrat BAGLIVUS (*k*). Musculosa cinguntur undiquaque membranæ nerveis, hinc harum vis magna est in fibras & canales musculosos. Nerveorum itaque canalium proprietates prius explicanda, quam ad reliqua me convertam.

§. XXIII.

Nervi, ut notum, sunt fasciculi teretes, conicæ probabiliter figuræ, (*l*) albicantes, ex pluribus canaliculis,
D
fluido

(*k*) Tr. de Fibra Motrice Lib. I. C. I. II. III.

(*l*) *Santorinus*, Tr. de structura & motu fibræ, §. XXXII.

fluido subtilissimo elastico irrigatis, compositi, communi membrana, a cerebri meningibus oriunda, (m) cincti & in membranas demum desinentes, quæ partes membranosas constituunt, (n) insuper omnes canaliculos musculosos cingunt, hinc, vario sensui, variisque motibus solidorum, producendis ac dirigendis, inserviunt. Cum nervi sint congeries canaliculorum fluido elastico irrigatorum, hinc obnoxii sunt illis generalioribus proprietatibus tam naturalibus, quam p. n., quas de canalibus, fluida vehentibus, (§. 19. 20. 21.) in genere prædicavimus. Hinc, ut fluida per eos legitimo ac naturali motu ferantur, determinato ipsis opus est resistentiæ gradu, cujus requisita generaliora (§. 21.) indicavimus, hinc, si nimis rigidi sunt, aut nimis laxi, motum fluidi nervei oriri impeditiorem, ex supra (§. 20.) dictis elucescit. Cum vero hi fasciculi ex pluribus canaliculis, membrana communi elastica cinctis, componantur, duplex hinc oritur vis resistentiæ, nempe tam a cohæsione & elasticitate membranarum singulos canales efformantium, quam ab elasticitate membranæ communis fasciculum hunc cingentis. Utræque hæc membranarum species suam quidem originem debent cerebro atque cerebello, hac tamen cum diversitate, ut illæ singulis canalibus propriæ, potius sint continuationes vasculorum medullaris substantiæ, hæc vero communis, duræ impr. atque piæ matris cerebri productio fit. (o) Cum autem dura mater sit membrana valde elastica & motu suo systaltico atque Diastaltico, (p) fluidi nervei motum

(m) Baglivus l. c. seqq.

(n) Idem, l. c.

(o) vid. Boerhave Inst. Med. §. 269. 270. 281.

(p) v. Hoffmannus Med. Rat. Syst. T. I. Sect. I. P. III. Cap. I. §. XV. it. Baglivus, Tr. de Fibr. Motu. l. c.

motum promoveat & dirigat: hinc, quo maior ejus est contractio, eo fortior erit impulsus hujus fluidi in partes, hinc quicquid in dura meninge contractionis nisum auget, illud accelerat impetum fluidi nervei in partes. Porro, cum experientia doceat, in corpore elastico, præsertim, si per qualemcunque tensionem elasticitatis gradum majorem acquisivit, uno ejus termino moto, eundem statim motum ad terminum oppositum motu tremulo propagari; præterea ex supra recensitis pateat, membranam nervorum communem nihil aliud esse, quam continuatam duræ matris portionem: Facile ex horum consideratione intelligitur, quod nifus in contractionem in hac nervorum tunica quocunque modo auctus, duram matrem statim ad æqualem contractionis nisum disponat, hinc impulsus augeat fluidi nervei in partes, hinc motus partium alteret. Ex his facile elucescit, membranæ hujus, quæ nerveorum canaliculorum involucrium est, læsionem, multo majorem vim habere, fluidi nervei impetum augendi, motusque in corpore humano alterandi, quam ipsos nervos læsos. Ulterius si inquiramus, membranosæ atque tendinosæ partes, ut mihi videtur, nihil aliud sunt, quam continuationes membranæ communis nervorum, ob soliditatem & durtiem, quam tactui præbent. Facile hinc cognoscitur, quam periculosa sit illarum læsio. Hæc brevissimis necessarium duxi recensere, ut nervosi systematis effectus in corpus humanum eo melius intelligantur. Quamvis autem motus omnes, qui per nervos fiunt, a systole & Diastole duræ matris deducendos esse, asseruerim, non tamen affirmare dubito, motum hunc duræ matris contractivum, non tantum ab ejus structura, sed maximam partem etiam ab a-

nimæ ipsius directorio proficisci, & si modum, quo in illam agat, indagare nequeamus.

§. XXIV.

Omnes nervorum effectus, quos in corpus humanum exerunt, ad duplices reducuntur classes, sensum nimirum atque motum. *Sensus*, externus scil., est interna determinata mentis perceptio, de rebus, quæ in corpus nostrum agunt. Experientia comprobatur, nullum fieri sensum, nisi in partibus, quæ nervis gaudent, & quo major nervorum copia partem ingreditur, eo majorem esse illius partis sensum. Cum itaque formalitas, ut ita dicam, sensus in compassione & reciproca actione mentis consistat, sequitur, ut arctissimum commercium vigeat, inter mentem atque nervos. Nervorum natura in eo consistit, quod sint canales membranacei, membrana alia communi cincti, fluidum subtilissimum vehentes. (§. 23.) Præter hæc per experientiam nihil in nervis reperimus, hinc vel membranæ nervos constituentes, vel fluidum nerveum, vel utraque simul, sensus instrumenta esse, necesse est. Si corpus quoddam in nervos impingit, non impingit immediate in fluidum nerveum, sed in membranas nerveas, cum autem actio corporis in aliud non fiat, nisi per motum, quem in corpore, in quod agit, excitat, hinc patet, corpus sensum excitans, movere immediate nervorum membranas certo ac determinato modo. Omnis motus in solido, ob relationem, quam utraque inter se habent, simul afficit, i. e. movet fluidum, hinc hujus est effectus motus membranarum; cum autem effectus intermedius propius & magis immediate cohæreat, cum effectum ultimo, quam causa, intermedium effectum producat, patet, motum
fluidi

fluidi nervei esse causam magis propinquiorem, respectu perceptionis internæ mentis, quam motum membranarum, cum autem præter hanc, nullam aliam possimus indagare causam, quæ sit intermedia, inter fluidi nervei motum, & perceptionem mentis, hanc causam diu pro proxima habere licet, donec alius causam inveniat propinquiorem, eamque demonstret. Porro, cum experientia confirmet, corpora manifeste fibras contrahentia, e.g. acida, Spir. vin. rectissimus, sensum in continenti augere, fibras vero relaxantia, eum imminuere ac hebetem reddere, per contractionem autem fibrarum, quæ constituunt extrema canaliculorum nerveorum, fluidum illorum moveri retro versus locum unde profluxit, locus autem, unde fluidum nerveum profluit, sit cerebrum: Hinc satis probabile est, *sensum fieri, per refluxum fluidi nervei ad cerebrum.* Pro diverso modo & impetu, quo fluidum nerveum ad cerebrum refluit, differt quoque *sensus.* Fluidum autem, cum per se nullam habeat motus progressivi causam intrinsecam, nisi gravitatem, gravitas autem fluidi nervei refluxum ad cerebrum, non promoveat, ut illi potius contrarietur: Hinc nulla mihi videtur subesse dubitandi ratio, quin ab extra, & quidem, per motum canalium, quibus vehitur, contractivum, retro ad cerebrum protrudatur. Hinc *sensus causa remotior est, contractio & hinc orta angustatio canaliculorum nervosorum.* Hinc pro modo & gradu, quo hi contrahuntur, variat quoque modus & impetus fluidi nervei fluentis ad cerebrum, hinc etiam *sensus.*

§. XXV.

Prius, quam ulterius procedam, quædam ad sensum producendum necessaria requisita in lucem proferam, quæ

tum ad explicandas varias sensuum læsiones, tum ad erudendum probabiliter, remediorum, quæ in sensuum læsionibus usui sunt, operandi modum, inserviunt.

1. Non requiritur ad sensum, ut omne fluidum nerveum ex canali nerveo refluat ad cerebrum, sed satis est, si fluidum illi canalisi parti proxime adjacens, retropellatur; & hunc motum retrogradum omnibus partibus fluidi a cerebro subsequenti communicet, per motum enim retrogradum omnibus fluidi intermedii partibus communicatum, nifus hic refluentis communicabitur illi fluidi nervei parti, quæ proxime adjacet cerebro; Hæc pars cum impetui cerebri resistit, sensum excitare potest.

2. Iter fluidi nervei ad cerebrum debet esse liberum. Hinc neque intra canales debet aliquid hære, quod motui ejus resistit, e. g. viscidum, alias motus superioribus communicari non poterit; neque ab extra quicquam hære debet, quod canales nerveos comprimit, horum enim latera compressa, magis intro flectentur, hinc motus particularum retro nitentium non communicabitur fluido superiori, sed versus latera impinget, hinc suum impetum refluentis in latera consumet, quem fluidis incumbentibus communicare debuisset. Nervi denique continui esse debent cum cerebro, alias nulla erit communicatio refluxus nervei fluidi cum cerebro, hinc nullus sensus.

3. Fluidum nerveum debet esse tenue, non viscidum, alias lateribus canalium adhærescit, & motum fluidi ab infra retronitentis debilitat.

4. Canalis nerveus, per quem refluxus fieri debet, sit justo modo tensus. Namque fluidum ab infra retropul-
sum

sum occurrit fluido, quod contrarium nifum habet, nempe ab impetu cerebri communicatum descendendi. Finge igitur, laterum resistantiam non esse æqualem impetui fluidorum sibi occurrentium; fluida non amplius agent in se ipsa, sed in latera laxa canalís, ubi minorem invenient resistantiam, eaque dilatando, sibi formabunt finem, in cuius latera impetus fluidi retronitens ita consumetur, ut non amplius par sit, movere sufficienti impetu superius retro, hinc nullus aut perexiguus communicabitur particulis fluidi, quæ proxime adjacent cerebro. Quod si vero latera habeant resistantiam æqualem aut maiorem, impetu fluidorum sibi occurrentium, tum fluida ob resistantiam laterum non possunt ad latera sibi invicem cedere, sed immediate in se ipsa agent. Hinc motus impressus communicabitur per totam fluidorum seriem usque ad cerebrum. Hinc, quo magis tensi sunt nervi, aut membranæ ex minutissimis canaliculis nerveis conflatae, eo acutius sentient. Et hæc quidem causa eo verior est, si canales nervei, uti verosimile est, (§. 23.) supponantur esse conici. Ex hoc fundamento, nimirum tensione diversa canalium nervosorum, optime explicari potest diversitas sensuum, & diversa partium constitutio, quæ requiritur, ad sensum hunc vel illum, acutiorem & hebetiorem producendum. Experientia quoque hoc assertum probat; partes enim nerveæ, per inflammationem, aut aliud extendens, magis, quam naturaliter, tensæ, multo sunt sensibiliores, quam in statu sano. Hinc ophthalmia laborantes non possunt aspicere diem, aut lucem quamvis, sine dolore. Patet & ex his ratio, cur, qui dolorem in una parte patiuntur, in vicina quoque facile ex levissima causa dolorem concipiant. Nam,
ob

ob consensum tensa una parte , tenduntur quoque fibræ partium vicinarum (§. 23.), ita , ut levissima de causa, quæ alias nullum dolorem protulit, possint ita affici, ut fluidum nerveum tanto impetu ad cerebrum refluere nitatur , ut dolor excitetur.

5. In canalibus debet esse sufficiens copia fluidi nervei, quanta nimirum opus est ad legitime & naturaliter distendendos ab intra canaliculos. Tensio enim ab intra si cedit , relaxantur , & multum de sua resistantia remittunt.

6. Fibræ non debent esse nimis rigidæ. Cum enim requiratur ad sensum excitandum , ut canales angustentur (§. 24.) fibræ, autem rigidæ ob inflexibilitatem a corpore externo non possint facile ita affici, ut unum latus alteri adducatur, sed fortiter resistent contractioni aut pressioni. (§. 8.) Hinc vel nullus, aut hebetior tamen sensus.

§. XXVI.

Sensus est vel *gratus* s. naturalis, vel *ingratus* s. præternaturalis. Hæc divisio fundamentum suum habet in supra allatis: Si enim refluens liquidum nerveum hac vi, in cerebrum impingit, quæ secundum has leges, ad quas DEUS corpus efformari voluit, naturalis est, aut cui natura per longum usum assueta est, tum *gratus* dicitur. Si autem impetus refluentis liquidi nervei tam fortis est, ut gravius impingat in cerebrum, quam hoc naturaliter perferre potest, aut, cui natura nondum assuevit, oritur sensus *ingratus* s. *Dolor*, qui nihil aliud est, quam sensus molestus, a tensione partium fibrarum nervearum ultra statum naturalem sensibilibiter aucta. DEUS enim ita conformavit humanum corpus, ut per annos aliquot duret, hinc

Hinc ipsi naturalem quendam sensum implantavit, mediante quo cognoscimus id, quod machinam nostram destruere annititur, ut illi removendo, per sensum molestum admoniti, medelam quæramus. Cum itaque quodvis fibras corporis nostri ad rupturam tendens, si diu continuat, aut augetur, pro effectū habeat fibræ destructionem, hinc DEUS ita efformavit fibras cerebri, talemque relationem esse voluit inter fibras cerebri & mentis perceptiones, ut a causa destruente, ita tendantur cerebri fibræ, ut ingrata inde oriatur in mente perceptio. Quamvis itaque modum tensionis fibrarum cerebri, & hinc natæ ingratae perceptionis eruere nequeamus, a posteriori tamen cognoscimus, illas male affici a causa destruente. Et quanquam hujus molestiæ causam proximam expiscari non possimus, remotiorem tamen conjectura assequi possumus. Et hæc explicatu facilis est, ex supra dictis. Pressis enim, aut nimium tensis uno impetu fibris canalium minimorum nervosorum, canaliculi nervei angustantur, hinc fluidum nerveum, quod in ipsis est, celeriter reprimunt versus cerebrum, hinc sensus dolorificus, & cum fibræ, ex quibus componuntur, minimorum canalium nerveorum latera, sint magis, quam naturaliter tensæ, hinc sensus oritur adhuc acutior. (§. 25. no. 4.) Ex his plura erui possent notatu digna, sed ob brevitatem tantum principia recensuisse sufficiat, adjectis adhuc paucis de sensuum læsionibus earumque causis.

§. XXVII.

Causæ sensum lædentes sunt vel in ipso fluido nerveo, vel in canalibus illud vehentibus. *Fluidum nerveum*, potest peccare vel *copia*, hinc sensus acutior (§. 25. no. 5.) vel

E inopia,

inopia, hinc hebetior, (ibid.) vel *qualitate* (ibid. no. 3.).
In canalibus ipsis si causa hæret, hoc erit 1. *in cavitatibus*
 eorum, si vel *ab intra* obstruuntur, vel *ab extra* compri-
 muntur. Ex utrisque provenit sensus læsio, quoad defe-
 ctum, (§. 25. no. 2.) 2. *In fibris ipsis canales constitu-*
entibus, si sunt vel *nimis tensæ*, hinc sensus naturali acutior
 & dolorificus (§. 25. no. 4.) vel *nimis relaxatæ*, hinc sen-
 sus hebetudo (ibid.) vel *nimis rigidæ*, ut ab externis mo-
 veri nequeant, hinc etiam insensibilitas. (§. 25. no. 6.)
 Hæc satis sint de sensu. Jam progrediemur ad motum.

§. XXVIII.

Ad Motum in corpore humano producendum requi-
 ritur, dispositio quædam & proportionata resistantia soli-
 dorum in fluida & impetus fluidorum in solida, de his au-
 tem, cum jam (§. 19. 20. 21.) quædam protulerim, &
 in sequentibus adhuc quædam attingere, animus sit, hæc
 in præsentī sicco pede transibo, & tantum h. l. inquiram,
 quid nervi ad motum conferant, & quæ sint, tam nervo-
 rum erga reliquas partes corporis, quam harum erga illas,
 ad motum producendum requisita. Omne, quicquid ner-
 vi ad motum conferunt, dependet ab illarum *abbreviatio-*
ne, qua partes fibrarum, musculosas compages constituen-
 tium, (quas ramusculis suis in membranæ formam expli-
 catis, undique cingunt,) ad se invicem magis adducunt.
 Abbreviationis causa est, uti probabile, *dilatatio* canalium
 nervosorum, canales enim ab intra dilatati, positis certis
 requisitis, dilatantur, ut experientia docet. *Dilatatio* de-
 pendet ab influxu fluidi nervei sufficiente in canaliculos
 nervos constituentes. In his quamvis ad Apodixin per-
 venire nequeamus, hæc tamen satis probabilia esse, multi
 Medi-

Medicorum explicarunt atque probarunt. Hinc cum plurima Phænomena motus, ex hac Hypothesi deduci queant, illa tamdiu utimur, donec magis certam agnoscam. *Motus instrumentum*, in quod nervi proxime agunt, sunt *fibræ musculares*. In has ut ad motum producendum influxus fluidi nervei debite fiat, requiruntur duplicis generis requisita, tam ex parte nervorum, quam ex parte fibrarum muscularium movendarum.

§. XXIX.

Ex parte Nervorum requiritur 1. ut canaliculi nervei ita sint dispositi, ut libera pateat via influenti fluido nerveo. Hinc ab intra non debent obstructi esse, materia quadam tenaci, nec ab extra latera eorum comprimi debent a materia ibidem hærente; obstructis enim vasculis, aut compressis ejus lateribus, sufficientem influxum fieri non posse, nemo negabit.

2. Ut fluidum nerveum sit tenue, non viscidum vasisque adhærens, alias motus ejus retardatur.

3. Ut in sufficienti copia adsit fluidum nerveum, quanta nempe opus est ad nervum legitimo modo dilatandum & abbreviandum.

4. Ut cerebri meninges in legitimo & naturali sint *Systoles* & *Diaesthes* motu. Meninges enim contractorio suo motu efficiunt influxum fluidi nervei in partes (§. 23.), dilatatorio secretionem fluidi nervei promovent. *Causa Diaesthes meningum* est impulsus sanguis a corde in cerebri internam substantiam, & in vasa meningum; Per sanguinis autem impulsu, & hinc factam cerebri dilatationem, expanduntur quoque meninges. *Systoles causa* est, tam naturalis resistentia & elasticitas meningum, quam a-

nima ejus motum contractorium varie alterans, forte etiam ipsi nervi per earum substantiam perreptantes. *Causa elasticitatis* naturalis meningum, dependet a fibrarum illas constituentium cohæsione satis arcta, causam autem, a qua hæc dependeat, demonstravi (§. 7. 8. 9.). Elasticitas s. resistentia meningum ita debet esse proportionata, ut cum sanguine ante suam dilatationem non sit in æquilibrio, alias nulla fieri potest Diastole (§. 20. 21.), tantus tamen debet adesse nifus earum in contractionem, ante earum tensionem, ut per hanc tensionem a sanguine factam, earum elasticitas ita augeatur, ut, cessante impetu sanguinis, resiliant, & quidem tanto impetu, quantus requiritur ad promovendum sanguinis motum per cerebrum, & influxum fluidi nervei in partes (§. 21.). Hinc intelligitur noxa, redundans ex *meningibus nimis strictis*. Nimis enim strictæ, quia in statu hujus stricturæ cum impetu sanguinis in æquilibrio sunt, sicut (§. 20.) de omnis generis canalibus explicavi, nullam concedunt dilatationem, hinc sanguinem in vasa cerebri non admittunt, hinc nulla potest fieri secretio fluidi nervei, hinc nullus ejus influxus in partes movendas, hinc *Apoplexia ex nimis strictis meningibus*. Si nimis laxæ sunt, per dilatationem a sanguine appulso factam, non acquirunt eum resistentiæ & impetus gradum, qui proportionatus est sanguinis motui promovendo (§. 20. 21.) & fluido nerveo in partes corporis impellendo, hinc sanguis stagnat in cerebro, comprimit minima vascula, ad secretionem liquidi nervei inservientia, fluidum nerveum hinc non propellitur in partes subjacentes, hinc *Apoplexia ex meningibus nimis laxis*. De meningibus adhuc notandum, ad motus voluntarios non requiri dire-

ete

De Diaſtolen meningum, ſed potius majorem, & ad motus uſque finem in hoc gradu perdurantem Syſtolen, quæ quidem fit per actum animæ, cujus autem modum explicare, difficile eſt.

5. Ut canales minimi nervei, & tunica communis illos ambiens, non ſint nimis ſtriſta, nec nimis laxa. Ut enim partes fibrarum muſcularium ad ſe invicem adducantur, canales nervei abbreviari debent, & hinc in tantum dilatari, quantum opus eſt ad partes fibrarum muſcularium ſibi ita adducendas, ut pars ipſa movenda moveatur, e. g. cubitus cum radio propius adducatur, humero, quod ut fiat, neceſſe eſt, ut poſt certam dilatationem canales nervei tantum nanciſcantur contractionis niſum, qui par eſt, tenſioni fibrarum muſcularium, contractioni earum reſiſtenti, ſuperandæ, hunc igitur contractionis niſum ſi poſt dilatationem & hinc factam tenſionem non acquirant, non poſſunt ad ſe adducere ſufficienter partes fibrarum muſcularium, nec illas movere. *Canalis nerveus nimis ſtriſtus* eſt, cujus latera ob fibrarum illa componentium nimis arctam cohæſionem aut copiam, cum impetu fluidi ſunt in æquilibrio (§. 20.). Hinc ita reſiſtunt fluido impetum facienti, ut dilatari nequeant, inde nec abbreviari poſſint. Hinc nulla partium fibrarum muſcularium poteſt fieri adductio, nullus itaque motus muſculorum (§. 28.) *Canales nimis laxi* conſtant fibris adeo debili cohæſionis niſu inter ſe cohærentibus, ut per influxum fluidi nervei naturalem, dilatati, poſt dilatationem non acquirant, tantum contractionis niſum, qui ut ante dictum par eſt ſuperandæ fibrarum muſcularium tenſioni, hinc vel influxus fluidi nervei augendus eſt, ita, ut latera canalium per majorem

dilatationem illam elasticitatem & contractionis nisum acquirant, qui requiritur ad superandam tensionem fibrarum muscularium, vel nullus fiet motus. Cum autem hoc, influxus fluidi nervei, augmentum jam sit aliquid præternaturale & reliquas partes debiliores reddat, ob inde oriundum defectum fluidi nervei in reliquis partibus, patet hinc, si motus per fibram nerveam laxam fiat, semper debilitari corpus. Cum porro ad plus fluidi nervei in canaliculos nerveos impellendum major & laboriosior requiratur meningum contractio, hinc motus ita productus erit difficilior & magno cum nisu & ingrata mentis perceptione conjunctus. Hinc non naturalis & sanitati conveniens (§. 2.). Hinc, ut naturalis & sanitati conveniens motus producat, fibræ canales nerveos constituentes, hoc gradu resistentiæ pollere debent, ut quidem ad determinatum, &, partibus fibrarum muscularium ad se invicem adducendis, proportionatum, abbreviationis gradum dilatari queant, post hunc vero dilatationis gradum non amplius cedant, sed tantum contractionis nisum acquirant, qui superare potest tensionem fibrarum muscularium contractioni earum resistentem. Cum autem fluidum nerveum non producat motum, nisi per fibras musculares, quod experientia testatur, hinc sequitur, *ex parte fibrarum muscularium* certam requiri relationem erga nervos, ut motus producat. Opus igitur erit, ut

§. XXX.

1. Determinato, nervorumque motui proportionato gaudeant cohæſionis & tensionis gradu, qui, ut naturalis sit, a. non resistere debet contractionis nisu, quem post tensionem a fluido nerveo factam nervorum latera

acquissiverunt. *β.* necesse est, ut post contractionem partium fibræ muscularis, cohæsiō partium muscularium non cedat resistantiæ movendi, sed illud attrahat. Hinc requiritur.

2. Ut non sint nimis rigidæ nec nimis laxæ. Quod si enim tanta est illarum tensio, ut a nisu contractivo fibrarum nervearum, post debitam tensionem acquisito, non possit superari, oritur hinc inflexibilitas, hinc motus impotentia. Fibrarum nimis laxarum in cohæsiōnem tam parvus est nîsus, ut superetur a resistantia movendi, hinc, quamvis partes fibræ per nervos ad se invicem propius adducantur, & attollantur, cohæsiōnis tamen nîsus cedens resistantiæ corporis movendi, facit, ut corpus movendum non moveatur.

3. Requiritur, ut intra cavitates fibrarum muscularium proportionata sit quantitas sanguinis elastici. *Primo* enim globuli sanguinis, in canaliculis s. fibris cavis muscularibus hærentis, sunt instar trochlearum, s. scytalarum, ut illos vocat BAGLIVUS (q), super quos fibrarum muscularium motus, ad partes eorum ad se adducendas, facilitatur. *Secundo*, Canaliculos s. fibras cavas musculares dilatando, fibras musculares abbreviat, hinc motui nervorum succurrit. *Tertio*, Quoniam, uti probabile est, nervi fibras musculorum circulares, prope tendinem, qui musculi caudam constituit, coarctat, hinc simul comprimuntur vasa, sanguis hinc a tergo adductus progredi nefcius, in corporis musculis colligitur, ejusque fibras cavas distendens, multo magis muscolum abbreviat, hinc motum musculi contractorium adjuvat. *Quarto*, ob elasticitatem
su-

(q) Tr. de Anatome Fibrarum & morbis solidorum.

suam restitutionem musculi promovet. Sanguis enim, ut modo recensui, coacervatus, comprimitur, impetu itaque fluidi nervei remittente, rursus refilit, & musculus restituit. *Sanguinis autem copia in musculo impetui fluidi nervei debet esse proportionata*, si enim in majori, quam par est, copia adsit, canaliculos musculorum nimis justo tendit, hinc eam immobilitatem gignit, quam (no. 2.) allegavimus.

§. XXXI.

Paucis hic necessarium duxi, usum, quem nervus affert omnibus solidis corporis humani, tam iis, qui motibus voluntariis obediunt, extra motum voluntarium, quam iis, quæ motibus voluntariis subjecta non sunt. Cum enim utræque hæ solidorum species, minimum pleræque vel totæ ex fibris muscularibus componantur, vel tunicis muscularibus cingantur: hinc patet, mutatis mutandis, eundem effectum in illis produci, quem de musculis in genere asseruimus. *In corde & arteriis* motum producit pulsatorium cujus causam in sequentibus explicabo. *In reliquis autem partibus, tonum* fibrarum auget. Tonus quidem partium, ut (§. 21.) indicatum est, dependet primario a soliditate & elasticitate fibrarum, fluidis, quæ vehunt, proportionata: cum autem elasticitas fibrarum dependeat a nisu fibrarum in contractionem (§. 9.), illam per nervos majorem reddi, facile intelligitur. Nervi enim etiam extra motum voluntarium fluido nerveo irrigati sunt, a quo semper aliquatenus dilatantur, hinc modice abbreviantur, ideoque partes fibrarum semper in quadam ad se invicem adductione, hinc fibram in contractione conservant; Igitur a nervis non mediocre elasticitatis aug-

augmentum acquirunt omnes fibræ corporis humani musculosæ ac flexiles.

§. XXXII.

Ex recensitis hac ratione causis & requisitis motus facile deduci possunt variæ motuum læsiones, a nervis & eorum cum fibris muscularibus commercio, oriundæ. Motuum ex hoc fonte læsorum *causa* quærenda est 1) *in fluido nerveo*, quod peccat, vel *qualitate*, si viscidum est, & non satis tenue, hinc motus defectus (§. 29. no. 2.) *vel influxus ratione*; Si enim in partes movendas impellitur *majori copia & impetu*, quam motus secundum naturam postulant, motus p. n. augmentur, sin *minori copia & impetu*, motuum defectus oritur (§. 29. no. 3.)

2) *In meningibus, & harum continuatione per spinalem medullam & nervis*, quæ si laborent, a. *Nimia & præternaturali Systole & Dia stole* simul, tum fluidum nerveum non solum in majori, quam par est, copia secernitur, sed etiam in omnes partes corporis magna vi & impetu propellitur æqualiter, hinc præternaturale partium robur, quale deprehendimus in Maniacis, monente Celeb. Dn. HOFFMANNO (r). Systole hæc & Dia stole meningum duplicem habet causam, nimir. systolen cordis præternaturaliter auctam, aucta simul eius Dia stole & præternaturali meningum strictura! b. *Si præternaturaliter relaxatæ sint*, hinc motuum defectus γ. *Si præternaturaliter strictæ sunt*, duplicis generis oriuntur læsiones. Si enim strictura earum quidem magna est, sed non tanta, ut impediatur influxus sanguinis in cerebrum, & fluidi nervei secretio, tum oriuntur fere eædem læsiones

F

quæ

(r) Med. Rat. Syst. T. I. Sect. I. P. III, Cap. I. II.

quæ a Systole & Diaſtole provenire (no. x), indicavimus, ut & *Spasmi* atque *convulſiones*. Sin ſtrictura earum tanta eſt, ut influxus ſanguinis in cerebrum, & fluidi nervei ſecretio impediatur, tum oritur *Apoplexia* ex ſtrictis meningibus, & univerſalis motuum defectus. Exinde conſtat, cur enormes convulſiones ſæpe in Paralyſin & Apoplexiam degenerent.

3) *In nervis ipsis*, qui lædi poſſunt, *α. ratione cavitatis* per viſcidum inhærens, vel latera ab extra compreſſa, *imminuta*, hinc motuum defectus (§.29. no.1.), *β. ratione fibrarum latera canalium nerveorum componentium* quæ, ſive ſint nimis rigidæ, ſive nimis laxæ, motus impotentiam & difficultatem generant, (§.29. no.5.)

4) *In fibris muscularibus movendis*, quæ ſi ſunt *nimis rigidæ*, motus impotentiam, ſi ſunt *nimis laxæ*, eandem producant (§.30. no.2.3.)

5) *In ſanguine per canales minimos musculares movendo*, qui, ſi defectu aut exceſſu peccet, motum impedit (§.30. no.4.). Cauſæ hæ recenſitæ magis vel minus complicatæ, varias motuum læſorum varietates gignunt, quas ob brevitatem ultro omitto, quædam tantum de duabus exacerbationis motuum ſpeciebus, *Spasmo* nimir. & *Convulſione* dicturus.

§. XXXIII.

Spasmi & *Convulſiones* inter ſe differunt, non, ratione cauſæ continentis & proximæ, ſed ratione partium, quæ p.n. moventur. *Subjectum Spasmi* ſunt potiffimum partes motibus voluntariis non ſubjectæ, quales ſunt omnes partes membranacæ, & ſphincteres quidem musculares. *Convulſionis* autem ſubjectum ſunt omnes partes motui volun-

suntario obedientes. *Causa proxima*, ut dictum, in utrisque una est, tantum gradu diversa: *Spasmus* nimir. minorem gradum causæ agentis; *Convulsio* majorem postulat. Major enim vis requiritur ad partes motui voluntario destinatas movendas, quam ad contractionem membranarum atque sphincterum. *Formalitas Spasmi* consistit in contractione præternaturali fibrarum muscularium partes membranosas cingentium, aut Sphincteres constituentium. *Convulsionis formalitas* absolvitur contractione præternaturali fibrarum muscularium, quæ sunt organa motuum voluntariorum. *Contractionis fibrarum causa* duplex est, vel elasticitas fibrarum intrinseca, quæ a cohæsione partium fibras componentium majori vel minori dependet, vel influxus fluidi nervei. Elasticitatem fibrarum intrinsecam, spasmorum & convulsionum veram causam non esse, exinde patet, quoniam spasmi & convulsionum in momento plerumque partes invadunt, fibrarum autem structuram internam & essentialem, in momento ita mutari posse, ut ex laxiori rigida evadat, asserere, ratione vix consentaneum videtur, præsertim, cum causa sæpe vix sensibilis talem momentaneam mutationem excitet; hinc influxum fluidi nervei copiosum & impetuosum pro causa allegare, plus quam probabile est. *Influxus fluidi nervei* cum originem suam habeat a motu contractorio meningum tam cerebrum, quam medullam spinalem cingentium (§. 23.), *causam influxus fluidi nervei copiosioris & impetuosioris, & inde ortorum spasmorum & convulsionum, esse motuum contractorium meningum autum & vehementiorem*, nemo negabit. Hinc omne, quod meninges ad motum contractorium vehementiorem di-

sponit, causa est remotior spasmorum & Convulsionum. *Causa hæc vel in ipsis cerebri aut medullæ spinalis meningibus hæret, ut acria meningibus inhærentia, acuta illud pungentia, it. inflammationes meningum, quæ, tendendo, elasticitatem ejus & nisum in contractionem augent, vel in nervis ipsis aut partibus nervosis, in his enim hæsitantia acria, aut corpora tendentia, ad multo majorem nisum contractionis disponunt canaliculos nervosos, & tunicam nervos cingentem: hinc a) fluidum nerveum in motu ordinario impeditur in hoc nervo & repellitur ad cerebrum: hinc majore copia fertur ad alias partes. Accedit ß) quod tunica nervos ambiens contracta ob continuitatem & elasticitatem in majorem contractionis nisum trahat meninges (§. 23.). Hinc vel in partes vicinas vel remotiores, in majori copia & majori impetu impellitur; hinc major contractio fibrarum, quæ illas partes constituunt, motus itaque auctior, hinc spasmi & convulsiones. Ex his patet ratio, cur una pars Paralyfi, altera convulsionibus tentari queat, præsertim, si causa Paralyseos sit acre quoddam, nervum quendam principalem ita contrahens, ut omnis influxus fluidi nervei impediatur. Patet & hinc, cur in causa ab acri obtudentia & fibras strictas relaxantia sæpe uno momento tam convulsiones, quam Paralyfin solvant. Constat etiam ratio & modus, quo affectus animi, impr. ira, quæ primario in meninges cerebri agere videtur, partium motus turbent. Plura, ex his & supra dictis eorumque collatione, curiosa, ut & necessaria deduci possent, nisi promissi memoria & paginarum angustia, ut ad alia progrederer, me monerent.*

§. XXXIV.

De musculoſo interim ſyſtemate (§. 22.) pauca tantum proferam, quæ ſequentibus explicandis inſervient. Ad hoc ſyſtema omnes quidem partes pertinent, quæ fibris muſcularibus componuntur, cor nimir. & omnes muſculi: Cum autem de muſculis eorumque motu in ſuperioribus jam multa adduxerim, pluribus de iisdem recensendis ſuperſedeo, cordis tantum & arteriarum, quæ, quamvis membranis conſtent, fibrarum tamen muſcularium multiplici ſerie cinguntur, hinc pulſus organa ſunt, motum, breviffimis recensiturus. Cor compoſitum eſt ex fibrillis cavis muſcularibus minimis multiplici & varia ſerie ſibi incumbentibus, & cavitates majores ventriculos dictos formantibus. Fibræ hæ muſculares ſanguine elatiſtico per arterias coronarias adducto turgent, inſuper cinguntur membrana ex ramuſculis, nervorum in membranam expanſis producta. Hinc triplex earum eſt vis, tam a fibrarum muſcularium niſu in contractionem, quam ab influxu fluidi nervei, & a ſanguinis elatiſtici fibras has dilatantis & earum latera tendentis, proportionata copia, dependens. Auriculæ pari modo conſtructæ ſunt. Ea igitur, quæ de cordis in fluidis pellendis virtute in medium proferam, ad has quoque applicanda erunt. Sanguis itaque per venam cavam magna ſatis copia adductus auriculæ dextræ latera diſtendit, quæ per triplicem illam vim, quam de corde demonſtrabo, mediante extensione talem elatiſticitatem acquirunt, ut ſanguinis influentis impetum ſuperent, hinc ſeſe contrahentia ſanguinem receptum, in cordis ventriculum dextrum immittunt. Quod idem cum ſanguine ex pulmonibus in auriculam ſiniſtram propulſo, ex hac in ventri-

culum finistrum expresso peragitur. Cordis fibræ hinc pressæ & angustatæ comprimunt quoque sanguinem in cavis s. interstitiis fibrarum hærentem elasticum, simul compressis fibris nerveis fibras musculares cingentibus, fluidum nerveum in motum retrogradum impellunt, quod ibi ad tempus stagnans collectum, majorem hinc se expandendi vim acquirit, imo fibræ musculares tensæ, ob elasticitatem naturalem, majorem se contrahendi sortiuntur nisum (§.9. 21.): Impetu igitur sanguinis in ventriculos influentis remittente, tum sanguis fibrarum elasticus compressus, tum fluidum nerveum ad tempus stagnans, tum fibræ musculares, omnia unitis viribus in statum pristinum sese restituentia, sanguinem in ventriculis contentum, orificiis auricularum per valvulas tricuspidales & mitrales clausis, tam in arteriam pulmonalem, quam in aortam impellunt; quo factò, valvulæ semilunares orificiis arteriarum appositæ clauduntur, hinc sanguis, amisso impetu protrudente, regredi tamen nescius, a lateribus arteriarum explanis, per triplicem vim, eodem modo, quem de corde explicavi, propellitur, & quidem ex arteria pulmonali in pulmones, hinc porro per aëris inspirationem in venam pulmonalem; ex principio autem aortæ, per successivum partium ejus motum in succedentia aortæ spatia, usque ad venas capillares arterioli capillaribus implantatas protruditur. Exinde clarum est, pro varia triplicium harum, quæ in solidis sunt, virium ad fluida, & horum ad solida directe moventia, habitudine & relatione, varias oriri motus cordis & arteriarum alterationes. Cum enim, ad motum cordis & arteriarum, non solum requiratur solidorum in contractionem nisus, sed etiam sanguinis impetus tam cor, quam

quam arterias distendens, hinc causa alterationis horum motuum, tam in solidis pellentibus, quam in sanguine solida ad motum stimulante quærenda est. *Solida*, quod attinet, fibra est l. laxa l. rigida: influxus fluidi nervei vel debilis vel fortis: sanguis in fibris muscularibus contentus, vel elasticitate majori aut minori, vel copia aut defectu peccat. *Fluidorum*, cor & arterias dilatantium elasticitas vel minor vel major est, copia & impetus, excessu vel defectu peccat. Cum denique *aër* sanguinem ex pulmonibus in venam pulmonalem pellat, hinc, expiratione aut inspiratione ejus læsa, læditur quoque sanguinis per cor & arterias motus. Ex harum itaque causarum varia collatione, diversæ oriuntur motus sanguinis per arterias & cor læsiones, quas recensere & ex causis suis explicare non superfluum esset: Cum autem dissertationis limites transcendere nolim, hæc jam prætermitto.

§. XXXV.

Medicamenta, quæ motibus corrigendis proxime inserviunt, sunt duplicis generis. Vel enim motus deficientes excitant, vel exacerbatos sedant. Vocabulum *motus* non in strictiori, sed latiori sensu accipio, tam sensum quam motus strictè sic dictos (§. 28. 29. 30. 31. 32. 33. 34.) sub illo comprehendens. *Sensus* pro causa proxima habet refluxum fluidi nervei ad cerebrum (§. 24.). *Duplici modo læditur sensus*. Vel enim *acutior* est, vel *debilior* quam per naturam esse deberet. *Sensus* præter naturam *acutior* semper cum ingrata mentis perceptione conjunctus est; hæc autem ingrata mentis perceptio, quæ oritur ab actione cujusdam corporis in fibram nerveam impingentis, dicitur *dolor* (§. 26.). Hinc sensus acutioris ideam, sub idea doloris

doloris complectar. Hac igitur occasione, ea, quæ dolores leniunt, medicamenta, eorumque operandi modum ex causis (§. 26. 27.) allegatis deducam. *Causa proxima doloris* est refluxus impetuosior, quam natura tolerat, fluidi nervei ad cerebrum. Hic ab angustatione præternaturali canalium nervosorum dependet. Hujus angustationis causa est quævis aut tunicarum nervearum, aut canalium nervosorum minimorum nimia tensio. *Tensio* hæc oritur
 1. *ab illis rebus, quæ immediate nervos in longitudinem extendunt*, quales sunt, omnes potentiæ nervum ab extra trahentes, item quævis corpora dura impacta, e. g. Calculus in ureteribus, ossa luxata, fracta &c. omnes quoque humores in canalibus stagnantes, & ab impetu succedentis a tergo liquidi ad canalium latera impulsu, progredi vero nescii. Hinc ab *Inflammatione* oritur dolor; hinc a sanguine in vasculis capillaribus intestinorum stagnante oritur colica sic dicta spasmodico-convulsiva. 2. *Ab omni re, quæ directe quidem nervos non tendit, sed fibras quasdam nerveas secundum longitudinem contrahit, & per hanc quarundam fibrarum contractionem, reliquas fibras nerveas tendit*, & hinc potius mediate dolorem causatur. Id quod faciunt omnia acria, quæ quidem, uti probabile est, partes fibrarum nervosarum, in quibus hærent, ad se invicem propius adducunt, per hanc adductionem quarundam partium ad se invicem, reliquas ipsis continuas partes ultra modum naturalem tendunt. Huc pertinet quoque *nervus punctus*, vel *non in totum discissus*: fibræ enim discissæ ob elasticitatem sese contrahunt, a se invicem recedunt, hinc, quia cum fibris integris adhuc cohærent, has, ab invicem recedendo, tendunt.



§. XXXVI.

Remedia dolori leniendo accommodata ad quatuor reducuntur classes. *Prima classis* respicit medicamenta, quæ causam tendentem tollunt. Cum autem hæc specialem morborum & causarum morbificarum considerationem pro fundamento habeant, horum explicationem ob brevitatem omitto. *Secunda classis* ea in se complectitur remedia, quæ ipsam fibrarum nervearum structuram, ita alterant, ut, cum antea ad dolorem usque tendi potuerint, nunc non amplius habiles sint ad talem tensionem, quæ ad dolorem producendum necessaria est, subeundam. Priusquam remedia ipsa recenseam, necessarium duxi, quædam, quæ ad naturam *tensionis* accuratius intelligendam, faciunt, præmittere.

§. XXXVII.

1. Ad fibram tendendam duæ requiruntur vires sibi invicem contrariantes, nimirum resistantia, quæ oritur a nisu omnium partium fibræ constituentium in contractionem, & impetus corporis tendentis, quem exerit, in superando illo contractionis nisu. Hæ vires, si ante actionem in æquilibrio sunt, ita, ut ante principium tensionis vis contractionis fibræ tanta sit, ut eodem resistantiæ gradu reagat, quo corpus tendens in ipsam agit, nullus sequitur motus, & nulla fibræ tensio. Hinc, si fibra nervea tensa per medicamenta roboretur, i. e. illum acquirat cohesionis gradum, ut in illa tensione, ad quam per corpus tendens, cum imbecillior esset, reducta est, superet vim tendentem, tum demum autem huic iterum æquibretur, cum ad naturalem tensionis gradum pervenit, tum nulla erit tensio, & dolor cessabit, (no. 3.). Ut itaque fibra tendi possit, requiritur, ut, ante actionem corporis tenden-

tis, determinatum habeat in contractionem nisum minorem tamen, quam est vis corporis tendentis.

2. Ut fibra rumpatur, requiritur, ut vis corporis tendentis superet summum resistantiæ s. nifus in contractionem gradum, quem per summam tensionem fibra acquirere potest. Summus enim fibræ in contractionem nifus, uti in omnibus corporibus elasticis experientia docet, est rupturæ proximus, qui si superetur per vim corporis tendentis, fibra rumpitur. Ut itaque fibra non rumpatur, sed semel tensa in tensione persistat, requiritur, ut post certam tensionem eum statum & nifum contractionis acquirat, qui æqualis est vi corporis tendentis, tum enim utræque vires erunt in æquilibrio, & nullus amplius motus neque tensionis neque rupturæ sequetur.

3. Experientia docet, non omnem partis nervosæ tensionem dolorem parere, sed illam tantum, quæ sensibilibiter major est, quam ad producendum validissimum motum naturalem requiritur. Hinc, si vis corporis tendentis tanta est, ut fibra nervea, quo cum vi corporis tendentis in æquilibrio sit, talem debeat acquirere resistantiæ gradum, quem aliter obtinere non potest, ac si ultra naturalem tensionis gradum tendatur, tum dolor oritur. Quo major supra naturalem requiritur tensionis gradus ad resistendum vi corporis tendentis, eo propior fibra est rupturæ, (no. 2.), eo major oritur dolor. (§. 26. & 37. no. 3.)

4. Si fibra nullo plane gaudet resistantiæ nifu, aut ad minimum tam parvo, ut a vi tendentis corporis non possit tendi, ultra illum tensionis gradum, qui ad motus naturales absolvendos requiritur, tum nullus oritur dolor, sed aut nullus plane, aut talis sensus, qui in statu sano per motus naturales producitur. Hinc si fibra nervea tensa in tantum

relaxatur, ut vel plane non resistat corpori tendenti, vel illi non magis resistat, quam in statu naturali, ad motus secundum naturam producendos, corpori movendo resistere deberet, tum lenitur dolor, aut plane cessat. Hinc quo magis fibram nerveam tensam & dolentem ad statum (no. 1. 4.) indigitatum deduxeris, eo magis cessabit dolor.

§. XXXVIII.

Secunda igitur classis (§. 36.) *remediorum dolores lenientium*, duas sub se complectitur species, tam *roborantium*, quæ cohæsiorem fibræ nerveæ augment, ut quo cum vitendente in æquilibrio sit, non plus tendi debeat, quam status naturalis postulat, (§. 37. no. 1. §. 25. no. 6.), quam *laxantium*, quæ cohæsiorem partium fibræ ita minuunt, ut post tensionem vel plane non resistent corpori tendenti, vel, quantumvis tensæ, tam levi tantum resistentiæ gradu, qui dolorem producere nequaquam potest. (§. 37. no. 1. 4.)

1. *Roborantia* sunt præcipue externa remedia, *spirituosa*, quæ partes fibrarum sibi propius adducendo, distensionem earundem resistunt, præterea fluida in vasis stagnantia, eaque distendentia per contractionem vasculorum capillarium reprimunt. *Terrestria* subtiliora, quæ cum ipsæ fibræ apponantur, eas fortiores reddunt. *Balsamica*, quæ cum constant principio terrestri, acido & oleoso, partes fibræ ob principium terrestre fortiores reddunt, ob acidum contrahunt, ob oleosum autem principium in interstitia fibrarum sese insinuans fibras tensas aliquantisper emolliunt, acria irritantia obtundunt, hinc eorum in fibras actionem debilem reddunt, & partium terrestrium adhæsiorem, fortius quoddam gluten substituendo (§. 6.), adjuvant. Hæ roborantium recensitæ species tum præcipue conducunt, si per vim contractoriæ auctam, dissipatio & expulsio objecti irritantis & tendentis sperari potest. 2. *Fibras relaxantia*, ad quæ

pertinent omnia emollientia tam interne, quam externe applicata, quorum satis copiosa farrago in libris medicis reperitur, ita, ut his recensendis ob brevitatem superfedere possimus. Hæc præcipue usu veniunt, in irritatione ab acribus, item si fluida, ob stasim & hinc factam partium aquearum separationem, solidiorem naturam induunt, hinc partes tendunt, in illis obtundentem, in his solventem & diluentem virtutem exerunt, hæc ita attenuando, ut per minima vascula penetrare possint. Præterea hæc maxime salutaria sunt, ubi, ob strictionem totius systematis nervosi, & motum humorum inde ortum citatiorem, fluida expanduntur, & sic nimis expansa, vasa præter naturam tendunt, hinc dolorem causantur. Fluidorum enim expansionem impediendo, & strictionem generis nervosi laxando, dolores egregie mitigant.

§. XXXIX.

Tertia classis sistit illa remedia, quæ communicationem nervorum cum cerebro tollunt, qualia sunt: nervi semi lacerati totalis resectio, nervi enim discissi non amplius dolent, ut experientia testatur, ob rationem (§. 25. no. 2) allegatam: it. continuata applicatio medicamentorum, canales nerveos fortiter constringentium, e. g. Spiritus Vini Rectif. olei Terebinth. &c. hæc enim, si diu admoveantur parti nervosæ, tubulorum nerveorum latera ita constringunt, ut cavitates illorum plane obturentur, & fluido nerveo nec influxum nec effluxum concedant. Hæc igitur in principio, ob vasorum nimiam & citam angustationem, summum dolorem, postea vero partis insensibilitatem causantur. Cum itaque hæc remedia partis subjacentis motum sensumque aboleant, hinc caute, & non nisi summa, ob dolorem prægrandem actiones vitales turbantem, urgente necessitate, aliis remediis irritis, in usum trahenda sunt.

§. XL.

Quarta denique classis est eorum, quæ ob visciditatem suam peculiarem, (cujus tamen naturam nondum intime cognitam habemus) in interstitiis canalium cerebri & principiis nervosorum hærentia,

tia, illos comprimunt, meninges relaxant, & ita fluidi nervei tam secretionem impediunt, quam motum tardiores reddunt. (§.23.25. no. 2.3. §.27.) Talia sunt sic dicta *Narcotica & Opiata*, Quæ quidem parce & circumspicte usurpanda, ne motus vitales plane supprimantur, qui tamen maxime necessarii sunt ad corpus tendens post dolorem sedatum evacuandum. Hoc enim in corpore remanente, dolor cito redit & ingravescit. Hinc in doloribus a Plethora ortis, in quibus vis solidorum in fluida pellenda jam satis debilis est (§.21.), it. in inflammationibus a sanguinis spissitudine, nec non in illis morbis, qui a causa maligna oriuntur, quæ, minima copia in corpore relicta, maxime nocent, aut plane non, aut satis parce usurpanda. Admittenda tamen sunt in illis doloribus, quæ vel a nimia ex motu aucto solidorum orta sanguinis expansione, vel a spasmodica vasculorum capillarium contractione, & hinc orta humorum stasi dependent, in his enim non solum anodyna, verum & simul Diaphoretica sunt. Nec, in iis doloribus, qui post materiam præparatam & e corpore eliminatam tamen adhuc sæviunt, aut si dolores & hinc coortæ vigiliæ, nimix evacuationes &c. ita urgent, ut vires inde sensibilibiter deperdantur, eorum usus contemnendus est, hac tamen adhibita cautela, ut semper cum terreis aut spirituosius misceantur, quippe quæ vires solidorum jam nimis deperditas egregie restituunt.

§. XLI.

De remediis sensum excitantibus nunc differendum esset: cum autem eadem fere sint fluidi nervei & nervorum tam ad motum, quam ad sensum requisita, uti constat ex collatione (§.24.25.26.27.28.29.30.31.32.) & diversitas sensus & motus (§is alleg.) tantum in diverso motu fluidi nervei quærenda sit; hæc remedia in præsentia ob brevitatæ studium omitto, ea, cum de motibus stricte sic dictis excitandis sermo erit, simul explicaturus. Prius itaque brevissimis agam de remediis motibus sedandis destinatis.

§. XLII.

Ex supra (§.29.30.) allegatis repetendum est, ad motum naturalem fibrarum muscularium producendum, requiri proprietates quasdam, tam in moventibus meningibus cerebri, quæ per contractionem suam fluidum nerveum in partes nerveas impellunt, quam in fibris nerveis & muscularibus, ad recipiendum modo proportionato impulsu fluidi nervei. Motus itaque, si p. n. exacerbantur, causa

quærenda est, partim in præternaturali strictura meningum cerebrum aut nervos cingentium, partim in resistantia, canaliculorum nervosorum aut tunicarum eos ambientium, non proportionata contractioni meningum p. n. auctæ, & inde dependenti impetui fluidi nervei p. n. fortiori. Ad motum enim per nervos producendum, in fibris nerveis requiritur quædam resistantia, cujus relationem ad impetum fluidi nervei (§. 29. no. 5.) indigitavi. Ponamus autem, fibras nervorum latera constituentes impetui fluidi nervei ita resistere, ut avi, qua naturaliter influit, tendi quidem, & abbreviari possint, non autem ultra illum gradum, qui ad motus naturales producendos necessarius est. Manente hac fibrarum nervearum resistantia naturali, augeatur p. n., vel per causam moralem, vel per causam Physicam, contractio meningum cerebri, hinc fortior erit impetus fluidi nervei, & fibræ nerveæ resistantiam huic impetui æqualem non aliter assequentur, ac per talem ab intra factam distensionem & abbreviationem, per quam motus p. n. aucti producuntur. Quod eo magis contingit, si musculosæ fibræ ita constructæ sunt, ut motui nervorum facile auscultent. Ex his elucescit, duas esse remediorum motus sedantium classes; *primam*, eorum, quæ ipsam meningum structuram præternaturalem tollunt; *secundam*, illorum, quæ structuram & dispositionem nervorum ita alterant, ut non apti sint ad recipiendum motum præternaturalem ex majori meningum strictura.

§. XLIII.

Ad priorem classem pertinent a. Remedia quæ causas stricturam inducentes tollunt. Has causas, cum variæ sint, & ad specialiores magis morborum considerationem pertineant, recensere, instituto meo contrarium foret. Hinc, ne nimis prolixus sim, variorum illas auferentium remediorum explicationi non diutius inhærebo, pauca tantum adhuc prolaturus. *De remediis ipsi stricturæ meningum medentibus.* Talia sunt *medicamenta relaxantia* varii generis, tam interne assumpta, quam externe, sub balneorum, fotuum, infessuum, unguentorum, linimentorum, oleorum, balsamorum &c. forma, vel toti corpori, vel parti tantum applicata. Hæc enim non solum meningis, sive idiopathice, sive sympathice strictas, ob tunicarum nervearum cum meningibus cerebri consensum laxant, sed etiam irritantia acris obtundunt, resolutionem nimiam sanguinis impediunt, stagna-

stagnationes a strictura capillarium ortas discutunt, dura loca nervoso impacta emolliunt, poros excretoriorum ductuum aperiunt, hinc irritantium evacuationem promovent. Hinc in febribus acutis varii generis, in affectibus scorbuticis, arthriticis, nephriticis, colicis, Hystericis, aliisque spasmodicis, adhibitis tamen cautelis necessariis, summo cum ægri emolumento applicari possunt. Huc quoque referenda sunt *Anodyna* correctæ, quæ tamen, summa adhibita cautione, ut (§. 40.) monitum est, in usum vocanda sunt. Tutius propinari possunt Aromata quædam, quæ sulphure leni Anodyno relaxant, e. g. Fl. Chamom. Croci &c. quæ post effectum Anodynum, non, ut Opiata, partium solidarum debilitatem, sed robur relinquunt.

§. XLIV.

Ad Posteriores (§. 42.) classis pertinent omnia *Antispasmodica* strictè sic dicta, quorum referenda sunt, absorbentia Gemmata, Diaphoretica fixa, Martialia, aliaque terrea, tam ex Regno Minerali, quam vegetabili & animali præparata, it. Gummata & resinæ, Balsamicaque leniora, quæ omnia, præterquam, quod acida absorbeant, & per hæc in sal medium conversa simul resolvant, fibras tam musculares, quam nerveas roborando, (§. 38.) earum resistantiam ita augment, ut illæ nervearum motui non tam facile auscultent, hæc autem fluidi nervei impetui resistere queant, absque tensione ultra gradum naturalem aucta (§. 42.). Hinc præcipue illis conveniunt subjectis, quorum nervi a variis præternaturalibus motibus debilitati, motibus his, data vel minima occasione, facile obediunt. His annumeranda sunt *acidulata*, & *acida leniora*, impr. vegetabilia. Hæc enim, partes fibrarum sibi invicem adducendo, tensioni per impetum fluidi nervei factæ resistunt, hinc hujus vim in nervos minuunt. Cum præterea alcalescentiam sanguinis nimiam impediunt: in febribus acutis impr. malignis & putredinosis egregii effectus sunt. Huc pertinent quoque *cinnabarina*, *nitrata* &c. quæ ob acidum terrestribus particulis immixtum, cum insuper sulphure anodyno leni polleant, ob causas jam allegatas, optima in variis morbis, impr. acutis, anodyna sunt. Plura de his in medium proferre paginarum angustia prohibet.

§. XLV.

Remedia motus excitantia sunt, i. quæ fibras laxas, tam nerveas, quam musculares, fortiores reddunt, qualia sunt a. *Nutrientia* subtilia

lia & jam fere præparata, uti sunt lac bonum, decocta panis & vegetabilium nutrientium, juscula carnum molliorum, gelatinæ ex his aut vegetabilibus paratæ, quæ tamen sæpius, & in minori copia, interpositis simul stomachicis, ad motum primarum viarum augendum & coctionem promovendam, propinare convenit. *β. Exercitatio*; hæc enim fibras roborat, præcipue musculares, si simul assumant, nutrientia & diluentia. Hæc enim si omittatur, fibras magis debiles, & sanguinem nutritioni ineptum reddit. *γ. Acidulata & lenia adstringentia aut roborantia*, (§. 44. no. 1.) allegata; hæc enim, tam contrahendo fibras, tonum, quam, materiam fibris apponendam suppeditando, robur earum augment. *δ. Aromatica & Balsamica* tam externe, quam interne prudenter adhibita. 2. *Sanguinis & fluidi nervi defectui medentia*: cujus generis sunt nutrientia modo allegata, cum aromaticis mixta. 3. *Sanguinem copia peccantem, aut in cerebro stagnantem, & fibras ejus comprimantem*, quæ auferunt, sunt, V.S. larga, parciore Diæta, & exercitatio. 4. *Meningum nimiam laxitatem corrigentia*: huc referenda sunt omnia stimulantia, & fibras roborantia (no. 1.) recensita, *ς. Materiam viscidam in canalibus nerveis hærentem & latera vasculorum comprimantem*, quæ corrigunt, & tollunt, sunt incidentia, resolventia, diluentia & stimulantia, tam interne quam externe admota, quo pertinent urticationes, & omnia externa excitantia. Hæc enim, contrahendo vasculorum nervorum extremitates, faciunt, ut fluidum nerveum retrahatur, & latera vasculorum compressa a se invicem dimovere allaboret, hinc, si diutius continuentur, per motum sæpius repetitum, viscidum vas ab extra aut intra adhærens discontinuetur & in sua vasa repellatur, quo fit, ut tam influxus, quam refluxus fluidi nervei fiat liber, hinc sensus & motus redeant. 6. *Rigiditatem fibrarum* tollunt, emollientia, diluentia, alcalia & saponacea, quæ, olea resolvendo, glutinis & fibrarum cohesionem minuunt & infirmant. (§. 6.) 7. *Nimiam meningum stricturem*, relaxant, quæ (§. 43. no. α) in medium prolata sunt.

§. XLVI.

Horum remediorum operationem ex supra allatis deducere facile erit, quam ob brevitatem sicco pede prætereo. Gratias interim ago DEO optimo maximo, quod auxilio suo his meis laboribus adesse voluerit, me meaque omnia ipsius gratiæ de vote commendans.

